


史部政書職官



鹵簿圖五卷書五卷 郊祀禮樂圖五卷書三十卷

元虞伯生曰國家龍飛朔方甫定中原中統至元間始  
建國都立宗廟朝廷修祭祀朝會之事而禮樂興矣至  
大天子出獨見親祠太室而祠官儒生言制度考文者  
彬彬然而來時則有若廬陵魯君巽初著鹵簿圖五卷  
書五卷郊祀禮樂圖五卷書三十卷上之江西行省丞  
相幹直善之以其書上聞召對玉德殿上曰禮樂之盛  
如此皇帝之所以尊也而儒生之用心亦勞矣官以太  
常署丞未幾議立圓丘方澤奉太祖以配天凡從祀壇  
壝玉帛犧牲樂與博士雜議巽初引援考論沛然有餘  
有司習於禮者咸推讓焉是年郊於圓丘天大寒雪執

事者多不勝而巽初在壇上領工登歌作樂音節諧亮  
世其藝者不能及也延祐元年史館留為編修官編摩  
暇尤得悉心文學著周易治鑑及克廣郊祀鹵簿舊說  
繪中道外伏等圖備極精贍而幹亦丞相番直命巽初  
以其書待於驂龍門下傳旨召入徧閱其圖問人馬物  
色甚悉曰後當有用勅秘府藏之而命為學士巽初力  
辭遂為翰林應奉兼編修七年英宗親祠太室始服袞  
冕太駕至廟有司倉卒凡旗旛蓋之屬就以立伏行皆  
重大以數人持一物天子製通天冠絳紗袍服之而輅  
弗素具遂易常服御馬而往弗稱上意丞相太常奏取  
秘書所藏巽初圖書而鹵簿大興矣有詔留守造五輅

老於事者以為輅古禮器不知其法乃命巽初專董其  
事按圖指授動中繩墨工人咸悅將成又請習馬以備  
駕朝廷尤重其先慮焉好讀書手不釋卷著書滿家愛  
古器物名書畫購之不計其貲平生所著述自上進之  
外有致美集成三卷心性論理氣辨經解正論合若干  
卷崇文鹵簿志十卷明時類橐藁若干卷超然集若干  
卷韻編杜詩十卷補注元遺山詩十卷過聞錄二卷藏  
於家



○  
文廟攷

明莆田宋元岳萬歷中以貢官建安教授所著有文廟攷四禮節要



明初律令

吳元年十月定律令諭曰立法貴乎簡當使言直理明人人易曉若條緒繁多或一事而兩端可輕可重使奸貪之吏得以夤緣為奸則所以禁殘暴者反以賊良善非良法也務求適中以去繁弊夫網密則水無大魚法密則國無全民卿等宜盡心參究凡刑名條目逐日來上吾與卿等面議之庶可以為久遠之法凡為令一百四十五條吏令二十四戶令二十四禮令十七兵令十二刑令十一工令二律準唐之舊而增損之計二百八十五條吏律十八戶律六十三禮律十四兵律三十二刑律一百五十二工律八命有司刊布中外李善長等賜

物有差  
文通云明興損益千古大都制辟以威令之為條一百  
四十五其法簡以嚴懸法以教律之為條凡三百其法  
明以悉賓興試判則唐律學之遺也鄉飲有讀法則胡  
安定教國子之意也高皇讀老子至民不知畏死奈何  
以死恐之遂除極刑宋景濂曰大明律凡近代比例之  
繁奸吏所資為出入者咸痛革之

### 大明令

明高皇命楊慈劉基陶安等裁定分吏戶禮兵刑工六  
部凡一百四十五條洪武元年十八日欽奉聖旨朕惟  
律令者治天下之法也令以教之于先律以齊之于後  
古者律令至簡後世漸以繁多甚至有不能通其義者  
何以使人知法意而不犯哉人既難知是啟吏之奸而  
陷民于法朕甚憫之今所定律令芟繁就簡使之歸一  
直言其事庶幾人易知而難犯書曰刑期于無刑天下  
果能遵令而不蹈于律刑措之効亦不難致茲命頒行  
四方惟爾臣庶體予至意欽此

邱瓊山曰按唐有律律之外又有令格式宋初因之至



神宗更其目曰勅令格式。所謂勅者，兼唐之律也。明洪武元年，即爲大明令一百四十五條，頒行天下。制曰：云云。六年，始命刑部尚書劉惟謙等造律文。又有洪武禮制諸司職掌之作，與夫大誥三編及大誥武臣等書，凡唐宋所爲律令格式，與其編勅，皆在是也。但不用唐宋之舊名，爾夫律者，刑之法也。令者，法之意也。法具則意寓乎其中，方草創之初，未暇詳其曲折，故明示以其意之所在，今是也。平定之後，既已備其制度，故詳載其法之所存，律是也。

唐樞曰：按律有違令笞五十之條，令即指是編，律無文而令有載，則以此坐之，故有律而是編不廢。

治譜十一卷

祥刑要覽

憲約

慎刑

明中丞余自強，健吾著分門爲十：曰初選，曰到任，曰堂事，曰詞訟，曰錢糧，曰人命，曰賊盜，曰獄囚，曰待人，曰雜事，凡十卷。又續集爲祥刑要覽，大抵爲筮仕州縣者而作。

吳門李模序畧曰：余壬申歲得健吾先生治譜一書，讀而善之。凡筮仕所欲知，胥情胥弊，賦役刑名，諸政務以及上交下交之節，文罔不具載，大抵綜法衷理而適於情高者不必俯，卑者不必仰，道之中也。政之平也，昨冬北上，攜諸行篋，因屬同志再一參訂。今之長吏偕率而往，可致小康，引人以功名之路，而要之大道之歸。此治



譜所以近而可徵也乃畧置評隲摯而梓之畿南猶記  
余之初受令也請於先達有曰嚴在門內寬在門外又  
曰縣官一點朱百姓一點血語極徑直使人骨竦既予  
臨事提醒兩言庶幾免過是書也以陳編視之未有不  
掩卷背馳者胞民與物體用自備何假外求若借為龜  
鑑也神而明之道其惟至誠乎憲約慎刑二書附刊於  
後亦偶出諸行麓用彰同善之意云爾崇禎丁丑秋日

洗冤錄二卷

明上海王圻著大抵說人命蒙冤相屍檢驗之法先公  
新川翁曾手錄之

治平要略二卷

要續一卷

明臨川韓世純大力著序曰天下之事非在下之人所能知也。上之人制之。草茅之士其何有焉。雖然。上知其源。下知其流。得失之策制于上。而利害之流及于下。因利害而証得失。亦可得其一二乎。臣滯草莽。熟睹時事。閒常求之。而知其得失之情矣。大抵天下之勢。唯君與民兩者而已。民所疾苦。欲知於君。君所役養。皆待乎民。二者相倚之切。而相恃之深。豈待言哉。然而民不能恃君。以安以全。君又不得恃民。以富以強者。皆生於中間。相至之處。路遠而力中軟也。路遠則情不相聞。而中軟不足以相舉。故所爲論。歸於近君民之途。而急相使之



勢而已。不切者不敢瀆陳。舉其一二大要著於篇。凡將以富強之本而富強之說亦即附焉。

大明集禮五十卷

洪武二年八月詔儒臣纂修禮書其書以吉凶軍賓嘉冠服車輅儀仗鹵簿字學樂爲綱所該之目吉禮十四曰祀天曰祭地曰宗廟曰社稷曰朝日曰夕月曰先農曰太歲風雲雷雨師曰岳鎮海瀆天下山川城隍曰馬祖先牧馬社馬步曰祭厲曰祀典神祇曰三皇孔子嘉禮五曰朝會曰冊拜曰冠禮曰婚禮曰鄉飲酒賓禮二曰朝貢曰遣使軍禮三曰親征曰遣將曰大射凶禮二曰弔賻曰喪儀又冠服車輅儀仗鹵簿字學各一樂三曰鐘律曰雅樂曰俗樂凡升降儀節制度名數織悉備具通五十卷至三年九月書成賜名大明集禮授魯



徐一夔周子諒董彞以官。惟梁寅等六人。以疾賜還鄉里。自虞周以至明初五禮。無不彙集。黃宗羲曰集禮之書。優于會典。

孝慈錄一卷

明洪武時。詔宋濂等考定喪服制度。歸安唐樞曰。孝慈錄。喪制發前古所未發。輕重損益一原。至情所不容已。夫子爲父母。庶子爲其母。皆斬衰三年。嫡子衆子爲庶母。皆齊衰杖期。酌時與勢。固爲禮之所從。及辨孔子所論魯昭公之服。亦不可謂非至論。又論喪禮不近人情。而限於太過者四。三大款。真知虛文之無用。誠至切之議也。

稽制錄一卷

上因藍玉以罪誅籍其家服食器用僭侈踰制因詔翰林院稽考漢唐宋功臣封爵食邑之多寡及名號虛實之等第編輯為書凡勲舊居室貨殖皆有定制御製序文頒示功臣

稽古定制一冊

楊士奇曰稽古定制一冊我太祖高皇帝命儒臣考唐宋制度酌其中示法於民者也孔子曰安上制民莫善於禮又曰君子以辨上下定民志故聖人之為天下國家者必重焉

禮儀定式一卷

明洪武時纂輯劉三吾後序曰萬方之所承式在京師京師之所承式在朝廷所謂正朝廷以正百官正百官以正萬民正萬民以正四方者也皇上奄有四海君臨天下以來治定制禮上之朝廷有儀注次之京兆又次之外府州縣有洪武禮制中外奉行亦有年矣乃者皇上萬幾冗隙載命禮曹與爾廷臣羣定朝儀繁簡適中以聞尚書臣李原名侍郎臣張衡則如旨條奏即日復召六部都察院通政司左春坊大理寺羣臣等面折厥衷惟允已乃以頒示永爲定式其條朝參八筵宴二出使三拜禮二公座司屬見禮公聚序坐三官員相遇引



避八常從儀從一。以至傘蓋冠帶服色器皿鞍轡弓矢。屋舍床榻之類。悉依品從。毋敢踰越。此理之常經也。然也。中間拜禮。先稽首四拜。後叩首一拜。爲見君上之禮。拜止於四。爲見東宮各親王之禮。見父母同四拜禮。見親戚官長。止兩拜禮。如宦者非隨從公侯駙馬。其自出入者。遇文武百官。須下馬讓道。其承宣召以下數事。遇應避官。不避。及司屬見禮。應避路者。有親戚尊卑之分。聽行私禮。此禮之從宜者。要在本乎常經。合乎人情而已。總之。則朝參第四條。於聖諭教戒。毋放肆怠聽。思爲省身克己之道。其諸條中最切要者。大槩能以聖戒存心。斯能於臣職無所不用其心矣。豈但遵奉儀式而已哉。

唐樞曰。是集成於洪武二十年。先是有禮制諸編。屢降。此則曲禮三千。詳其細也。行之既久。中間朝廷之上者。尚欽遵不廢。其在臣下所合行。多漸改於其舊。雖其勢有不得不然。然亦可以觀世運矣。

○教民榜文一卷

歸安唐樞曰大誥。硝黃之攻。教民榜文。參朮之補。不去病。則扶元氣之劑。無以施。里老一着。最有味。惜後無深體而實行者。

嘉靖祀典考十七卷

明史無  
考字

明史官輯不著姓氏郊禋集議十四條郊禋儀制四十  
七條附七條宗廟集議儀注六十三條社稷八條附三  
條陵寢六條附十四條歷代帝王十四條附三條先師  
十二條附二條先農四條先蠶廿八條皆嘉靖元年  
至四十五年一朝事也改革制度明代諸帝惟世廟最繁  
尤莫繁於祀典故特聚為一書以備考鏡



皇明典禮志二十卷

明萬曆間江夏郭正域美命明龍輯凡二十卷其自序曰夫禮本天殺地綱紀人倫利用安身教民成俗唐虞三代代有損益革命之際多沿先代周人初年肇稱殷禮漢帝草儀雜採秦法唐皇修文多用隋禮宋初通禮半約唐儀即有損益所因居多胡元之世天澤既易禮安用之先王典刑淪漸無存冠冕椎結號令侏儻大拜天即日月山金書玉篆用蒙古字冊后之初帝后並坐大明殿右丞相起而上壽壽帝壽后冠禮從其本俗大宴而服質孫冬則納石宝里夏則鉞笠都納剪柳代拜行之百年文物盡矣高皇闢乾坤而新日月朝百神而首庶

物在位三十餘年世而後仁即位之初勅中書省禮制未定令天下郡縣舉高潔博雅之士年十四以上者於是儒士徐一夔梁寅周之諒胡行簡劉宗弼董彝蔡深滕公琰至京詔同修禮書元年議郊祀耕籍禮二年六月讀叔孫通至魯兩生不甯行因謂侍臣曰叔孫雖竊禮糠粃然創制於煨燼之餘以成一代之制可謂難矣兩生不無迂耶必待百年朝廷之禮廢矣三年勅尚書崔亮等議喪禮九月大明集禮成其書準五禮而益以冠服車輅儀仗鹵簿字學四年六月御東閣與羣臣言禮樂禮書陶凱曰整齊俗必以政形上日教化必先禮義政刑非所先也八月諭廷臣曰古帝王辨貴賤明等

威漢高初興即禁錦繡綺縠操兵乘馬歷代皆然近代風俗侈靡閭里之民服飾居處無異公卿奴僕賤賤隸侈肆鄉曲貴賤無等元之失也中書省其以房舍服飾明立禁條頒示中外俾有所守五年三月謂禮臣曰成周大司徒以五禮防萬民之偽而教之中元以夷變夏先王之禮熄矣其稽攷典禮布之天下庶幾復古六年三月禮官上所定禮儀上謂禮書諒曰元氏棄禮因循百年中國之禮變易幾盡朕夙夜不忘振舉汚俗其更參訂務合人情永為定式庶協朕志七年十一月奉慈錄成定父母三年喪制自是十餘年間所著禮書曰國朝制作曰禮要議曰皇朝禮制曰禮儀定式曰大明禮



制曰洪武禮法曰禮制集要曰禮制節文曰太常集禮  
曰禮書諸所藏秘閣繪圖說文者未暇悉數上之郊廟  
朝廷次之侯王郡邑下之閭巷州黨洋洋優優無大無  
細隆禮由禮如正至而傳同慶則行慶之施也覲而定  
黜陟則明試之規也祭祀而去俎豆則順時之意也訓  
儲而設再拜則教胄之規也永思而隆徽稱則追王之  
道也宮壺而等后妃則軒轅之儀也封拜而嚴本支則  
主器之本也辨冠婚而逮士民則周道之隆也喪服而  
均斬袞則孺慕之本也冠服而省五冕則易簡之道也  
曰嬪而正禮文則釐降之義也其間損益百王越千古  
或以義起或沿時革遠巡狩監國之禮肇於文皇書禮

樂之文正於孝宣皇講閣談經之儀定於英皇陵廟嫡  
庶之分正於孝皇郊廟耕蠶之儀舉於世皇而我明一  
代之禮伯夷不能典桂下不能述矣夫禮貴因時道沿  
人心惟聖人能通其意惟聖人能定其極當其時即叔  
孫奉常之綿蕪沮午可行之再生儀猶有取焉不當於  
心即新氏之周官弱宋之周禮是安知禮意益至我明  
而官天地府萬物格上下感鬼神美矣善矣無以復加  
矣茲識其大者而纖悉因革則有司存

總目首登極儀次大朝儀次朔望朝儀次常朝御殿儀  
次常朝御門儀次午朝儀次諸王來朝儀次諸司朝覲  
儀次朝皇后儀次東宮朝賀儀次三司朝賀東宮儀次



親王朝東宮次蕃王朝貢禮次蕃使入見禮次大宴儀  
次節令次宴命婦儀次東宮宴儀次宴蕃王儀次東宮  
宴蕃王次宴蕃使次上尊號次上徽號次冊立皇后次  
冊妃禮次冊嬪禮次冊立東宮次冊東宮妃次冊親王  
儀次冊王妃次冊公主儀次皇帝加元服次皇太子加  
元服次皇太孫冠禮次親王冠禮次品官冠禮次庶人  
冠禮次皇帝大婚次皇太子婚次東宮偏妃禮次親王  
婚禮次王妃禮次公主婚禮次教習駙馬次品官婚  
禮次庶人婚禮次大卹次皇太后喪禮次皇嫂喪禮次皇  
太后喪禮次皇妃喪禮次皇太子喪禮次太子妃喪禮  
次親王喪禮次公主喪禮次品官喪禮次庶人喪禮次

服制次耕籍次親蠶次經筵次日講次無逸殿講次東  
宮出閣次皇長孫讀書次親王讀書次巡狩次監國次  
鹵簿儀仗次大駕鹵簿次儀仗次丹陛駕次太皇太后  
皇太后鹵簿丹陛儀仗次皇妃鹵簿次皇妃鹵簿儀仗  
次東宮鹵簿次東宮儀仗次東宮妃鹵簿次東宮妃儀  
仗次親王儀仗世子同次親王妃儀仗公主世子妃同  
次郡王儀仗次郡王妃儀仗次郡主儀仗次公侯百官  
儀從次皇帝冠服次皇妃冠服次皇妃冠服次皇嬪冠  
服次內命婦冠服次宮人冠服次皇太子冠服次皇太  
子妃冠服次親王冠服次親王妃冠服次公主冠服次  
王世子冠服次世子妃冠服次郡王冠服次郡王妃冠



服次長子冠服次郡主冠服次長子夫人冠服次宗室冠服次內使冠服次侍儀舍人校尉刻期冠服次齋郎舞生冠次品官冠服次外國陪臣冠服次內外命婦冠服次內外官員親屬冠服次士庶冠服次士庶妻冠服次進士巾服次生員巾服次吏員巾服次軍士衣服次僧道衣服次教坊司巾服次大朝宮殿次內閣次王宮志次郡王府第次公主王府第次官民居室又雜典禮次寶璽次印信次習儀次迎聖母次進歷頒歷次進春次有司鞭春次正旦立春次萬壽遇冬至次聖旦遇祭日次藏冰次救日月食次祈禱災祥次皇子誕生日皇子命名次皇女誕生次皇女命名次皇太子與諸王書式

次開讀次迎接詔赦次頒詔總兵官次頒詔諸蕃次文武官辭謝次講女訓次外戚朝見次表箋式次忌辰次降王拜位次受降次獻俘宣捷次賞廉能次大班糾劾次頒誥勅次官員受誥封贈竝焚黃儀次頒賜受賜次賜坐繡墩次政事碑次進實錄次進玉牒次王國禮次鎮國將軍禮次儀賓班次官員禮次風憲有司品級高卑禮次三司禮次南京會議坐次到任次公座次致仕與有司班次相見禮次拜禮次閣中文移次諸司文移式次鄉人禮次大射次僧道次器四次床帳次期年不奔喪次期功迴避次為大臣發喪次恤典次謚次輟朝

祭禮儀註二卷

明太平謝省世脩著。兄子鐸鳴治序曰。成化癸巳。先叔父太守先生。蒙恩休致。輒葺祠堂。以爲行禮之地。鐸在京邸聞之。喜不自勝。謹奉書先編脩府君。請踵先生而亟爲之。未幾。先府君棄諸孤。祠雖立。而龕櫝之制未備也。鐸以憂解官東歸。乃始得備其制。仍置祭田以共歲事。先生既又定爲儀註。俾鐸等共守之。於乎。茲禮之廢也久矣。獨吾家與吾鄉也哉。先生篤好古道。始創以復。又因而推之。於冠則行三加。於昏則備六禮。於喪則痛革燕飲之俗。於祭則力排祈禱之非。數十年來。環百里之內。間有從而行之者。噫。先生扶世。瀉民之功。於是大



矣。鐸無似。不能上佐下風於萬一。謹錄先生所爲儀註。而著其說於首。俾知百數十年曠典之興復。實自先生始。庶吾後世之子孫。得有所憑藉遵守。而不墮於豺獾之不若矣。於乎。其敬念之哉。

又書後曰。冠婚喪祭禮之大者。皆有家日用之常。所以綱紀人道之始終。不可一日而不脩者也。然冠婚喪三禮。或越世逾年。皆因事而舉。非若祭禮。月必有薦。時必有享。而三者之禮。亦必待是而後行。此先生之儀註。所以必先於此。以見其尤不可一日而缺焉者也。先生所著有行禮或問。常編舉三禮。而家禮撮要。亦併及之。嘗行於寶慶舊治。此蓋詳示一家之子弟。俾講習焉。以免

於臨事之失云耳。文公有言。凡祭主於盡愛敬之誠。而已。貧則稱家之有無。疾則量筋力而行之。財力可及者。自當如儀。於乎。後之有事於斯禮者。其尚因先生之儀註。以求盡夫文公之所謂誠敬者哉。

此書乃鳴治叔父著。景泰甲戌進士。寶慶知府。弘治六年卒。年七十四。別號愚得。更號台南逸老。私謚貞肅先生。明史卽以此書爲鐸所作。非也。



○  
禮儀志一百卷

明華亭俞汝楫仲濟著松江府志曰楫仁慈樂易終身  
不見喜愠之色少有文名究心聖學兼綜經濟之務與  
東林講席顧端文憲成高忠憲攀龍每爲之虛左焉曾  
應大宗伯命輯禮儀志百卷病卒里中私謚爲端慤先  
生知府方岳貢改曰清惠

三事忠告三卷

元張養浩希孟著養浩濟南人自幼有行義勤學業嘗著書三卷一曰廟堂忠告二曰風憲忠告三曰牧民忠告言居官之道

淮浦張綸曰張文忠公三事忠告誠有位者之良規觀其在守令則有守令之式居臺憲則有臺憲之箴為宰相則有宰相之謨醇深明粹真有德者之言也蓋嘗謂讀其書考其為人能竭忠徇國正大光明無一行不踐其言希孟之學豈有得於懷孟之博與

大元通制

元起翔漢至有天下百有餘年宸斷之所予奪廟謨之所可否禁頑戢暴仁恤黎元綽有成憲然簡書所載歲益月增散在有司莫知所統挾情之吏用譎行私民愴政蠹臺憲屢言之鼎軸大臣恒患之仁廟御極之初中書奏允擇者舊明練若右丞相伯杭商議中書劉正等由開創以來政制法程可著為令者類集折衷以示所司其宏綱有三曰制詔曰條格曰斷例經緯乎格例之間非外遠職守所急亦彙輯之名曰別類延祐三年夏書成勅樞密御史翰林國史之臣相與是正凡經八年事未克果英宗至治二年丞相援據本末奏宣如仁康



制制可於是樞密侍御史宗正學士奉旨會集中書衆  
共審定仍以延祐二年及今所未類者請如故事由是  
堂議題其書曰大元通制命李木魯辨序之  
元至治三年命完顏納丹曹伯啓纂集累朝格例而損  
益之凡為條二千五百三十有九名曰大元通制頒行  
天下伯啓言五刑者刑異五等今黥杖流徒役於千里  
之外百無一生還者是一人身被五刑非五刑各底於  
一人也法當改丞相雖是之而卒不果行

### 元憲典

元至元元年作憲典其篇二十有二曰名例曰衛禁曰  
職制曰祭令曰學規曰軍律曰戶婚曰食貨曰大惡曰  
奸非曰盜賊曰詐偽曰訴訟曰鬪毆曰殺傷曰禁令曰  
雜犯曰捕亡次之曰恤刑曰平反曰赦宥終之以獄空  
則辟以止辟之效成刑期無刑之德可見矣

至元新格

元至元元年制至元新格去金人嚴刻之政一意簡除煩苛其五刑之目凡七下至五十七謂之笞刑凡六十  
七至一百七謂之杖刑其徒法年數杖數相附麗為加  
減鹽徒盜賊既決而又鐐之流則南人遷於遼陽北人  
遷於湖廣死刑則有斬而無絞惡逆之極者又有凌遲  
處死之法焉蓋古者以墨劓剕宮大辟為五刑後世除  
肉刑乃以笞杖徒流死備五刑之數元因之更用輕典  
世祖謂宰臣曰朕或怒有罪者使汝殺汝勿殺必遲回  
一二日乃覆奏其笞法曰天饒一下地饒一下皇帝饒  
一下故應十者止減為七其平反之法諸路府軍民長



因收捕反叛輒羅織平民其同僚能理平民之寃正犯人之罪歸其俘鹵活其死命者於本官上優陞一等凡職官能平反重刑平反寃獄一起以上加等陞用諸路府曹吏能平反寃獄者於各道宣慰司部令吏補用邱瓊山曰按自隋唐以來除去前代慘刻之刑死罪惟有斬絞二者至元人又加之以凌遲處死之法焉所謂凌遲處死即前代所謂髑也前代雖於法外有用之者然不著於刑書著於刑書始於元焉其笞杖每十數必加以七者其初欲減以輕刑也其後承誤反以為加焉大德間王約上言國朝之制笞杖十減為七今杖一百止宜九十七又不當加十也則其立法之始意可見矣

大元通制條例綱目

元撫州張紹著吳澂序畧曰古刑三千已無其書律十二篇蓋其遺法自秦以來官府之所遵守吏師之所授受而各代頗有釐革者也李唐增脩視前加密柴周續纂比舊尤精所因據古律正文所損所益或附敕令格式敕者時君之所裁處令者官府之所流布格式者各代之所造設也與律相參歸于允當宋建隆間命官重校號稱詳定刑統而云周顯德律令後不行夫不行者謂不行於周顯德所纂之本非謂不行歷代相承古律之文也皇元世祖皇帝既一天下亦如宋初之不行周律俱有旨金太和律休用然因此遂并古律俱廢中朝

大官懇懇開陳而未足以回天聽。聖意蓋欲因時制宜。自我作古也。仁宗皇帝克繩祖武。爰命廷臣類集累朝條畫體例爲一書。其綱有三。一制詔。二條格。三斷例。延祐三年夏書成。英宗皇帝善繼善述。申命五府憲臺暨文臣一同審訂。名其書爲大元通制。頒降于天下。古律雖廢不用。如此書爲皇元一代之新律矣。合新書文辭各異。意義多同。其於古律暗用而明不用。名廢而實不廢。何也。制詔條格猶昔之敕令格式也。斷例之目曰衛禁。曰職制。曰戶婚。曰廩庫。曰擅興。曰賊盜。曰鬪訟。曰詐僞。曰雜律。曰捕亡。曰斷獄。一循古律篇題之次第。而類輯古律之必當從。雖欲違之而莫能違也。豈非暗用而

明不用。名廢而實不廢乎。宋儒謂律是八分書。而士之讀律者亦鮮。吾郡張紹漸漬儒術。練習法律。爲律吏師。通制未成書之時。編錄詔條。及省部議擬通行之例。隨所掌分隸六部。題曰大元條例綱目。枚莖朗例。采拾該徧。由初逮今垂四十載。功力勤甚。紹已自敘于前。而予嘉其可以輔通制之書。故又爲之後敘。予以推尊而符古律。志於究律學者。其尚慨想於斯焉。



疑獄集四卷

後晉贈中書令右僕射平章事魯國公和凝集將仕郎守  
太子中允和嶠述嶠序曰易曰先王以明罰勅法君子  
以斷獄致刑書曰欽哉欽哉惟刑之恤哉兩造具備師  
聽五辭是知古之聖賢慎茲獄訟念一成而不變審五  
聽以求情悉其聰明致其忠愛俾無枉濫以召和平在  
上者既能盡心居下者得以措手其來尚矣可略言焉  
先相國魯公嘗採自古以來有爭訟難究精察得情者  
著疑獄集二卷畱於篋笥小子嶠得遺編而諷讀認先  
訓之丁寧蓋將以開悟後人流傳永世足使愚夫增智  
聽訟而不敢因循酷吏斂威決獄而皆思平允助國家

之政理。爲卿士之指南。仁人之言。其利甚博。况當聖世。詎可平沈。蒙伏自天。闕策名。宦途結綬。三任親民於劇邑。二年作吏於秋曹。每窮闢訟之源。益慕精詳之理。因敢討尋載籍。附續家編。滿百條。勒成四軸。上二卷。先相國編纂。下二卷。小子蒙附續。父作子述。誠有愧於下才。刑清政平。冀少裨於大化。

至元十六年。錄本。愚齋杜震序。

大明律三十卷

又更定大明律三十卷

明洪武六年。命刑部尚書劉惟謙詳定其律。篇目皆準唐律。采用舊律三百八十八條。舊令改律三十六條。因事制律三十一條。掇唐律以補遺一百二十三條。合六百有六。分爲三十卷。其間損益務合輕重之宜。每成一篇。輒繕寫以進。上命揭于西廡之壁。親加裁定。及成。宋濂爲表以進。頒行天下。九年十月。又謂猶有擬議未當者。命胡惟庸汪廣洋等詳加考訂。釐正者凡十有三條。至二十二年。因刑部奏律條增損不一。請編類頒行。遂令翰林院同刑部官。取比年所增者。參考折衷。以類編附舊律名例。律附于斷獄下。至是特載之篇首。



洪武九年十月。太祖覽大明律。謂胡惟庸汪廣洋曰。古者風俗厚而禁網疎。後世人心漓而刑法密。是以聖王貴寬而不貴急。務簡而不務繁。國家立法得中。然後可以服人心而傳後世。昔蕭何作漢律九章。張湯猶得以私意亂之。况始未盡善。其能久而無弊乎。今律條猶有擬議未當者。卿等可詳議更定。務合中正。仍具存革者以聞。于是惟庸廣洋等復詳加考訂。釐正者凡十有三條。

洪武三十年五月。御製大明律序曰。朕有天下。倣古為治。明禮以導民。定律以懲頑。刊著為令。行之已久。奈何犯者相繼。由是出五刑。酷法以治之。欲民畏而不犯。作

大誥以昭示民間。使知所趨避。又有年矣。然法在有司。民不周知。特勅六部都察院官。將大誥內條目。撮其要略。附載于律。其遞年一切榜文禁例。盡行革去。今後法司。只依律與大誥議罪。合黥刺者。除黨逆家屬。并律該載外。其餘有犯。俱不黥刺。雜犯死罪。并徒流遷徙笞杖等刑。悉炤今定贖罪條例。科斷編寫成書。刊布中外。使臣民知所遵守。

邱濬曰。按自魏李悝作法經六篇。蕭何加以三篇為九章。後世作律。本以為宗。劉劭衍漢律為魏。賈充參魏律為晉。唐長孫無忌等聚漢魏晉三家。擇可行者定為十二篇。自名例至斷獄是也。明朝洪武六年。命刑尚書劉

惟謙等重定諸律。以協厥中。而近代比例之繁。奸吏可資以出入者。咸痛革之。每一篇成。輒繕寫上奏。揭于西廡之壁。篇目一準於唐之舊。采用已頒舊律二百八十八條。舊令改律三十六條。因事制律三十一條。擬唐律以補遺一百二十三條。合六百有六。分爲三十卷。其間或損或益。或仍其舊。務合輕重之宜。其後以其比類成篇。分合無統。復爲釐正。定爲吏戶禮兵刑工六類。析十八篇。以爲二十九。約六百六條。以爲四百六十。析戶昏以爲戶役昏。姻分鬪訟。以爲鬪毆訴訟。廩庫一也。則分廩牧于兵。倉庫于戶。職制一也。則分公式于吏。受贓于刑。馬名例舊五十七條。今止存十有五。賊盜舊五十

三條。今止存其二十八。

薛文清曰。凡國家禮文制度法律條例之類。皆當熟讀深攷。陸桴亭曰。孔子動稱周家制度。雖周公制作之善。亦從周故也。予每怪後儒學孔子。亦動稱周家法度。而於昭代之制。則廢而不講。亦不善學孔子者矣。又曰。居官而讀律令。所謂入國問禁也。昔陸文量公嘗言。國家當設宰相。及讀律令。有以後官員人等。有妄言設立宰相者。滿朝文武大臣。即時執奏。將本犯陵遲處死。不覺失色。因歎。居官不可不讀律令。今之學者。奈何忽諸。唐樞集載大明律直引一書。言成于洪武三十年。共四百六十條。當即是更定大明律。



大誥一卷

明太祖高皇帝御製劉三吾後序曰。皇上有天下以來。海宇之廣。生齒之衆。機務之繁。思得賢才以圖治道。若稽古典。內設六卿。外建十有三道。道有所屬。府州縣雖職任大小。其上爲朝廷分憂。下爲生民造福。則一而已。日者中外臣庶。罔體聖心。大肆貪墨。原弊所起。由於六曹。爲罪之魁。莫甚郭桓。六曹端本澄源之地。而乃贓貪不法。交通所屬。重爲民害。其或根株蔓延。能卓然自拔。密緘上聞。可也。乃一槩剝民。涇渭淆矣。何尤乎人。上弗忍生人之無幸也。不得已。施之五刑。致使有生之命。代當死之命。設若守分。則俸如井泉之不竭。顧乃貪婪。譬

猶潢潦。其涸可立而待。斯玉音日夕所宣諭也。聞者宜惕然矣。而犯者自若。復不忍棄絕之。載勞聖慮。條畫成書。頒示中外。臣民家人傳誦。否者罪之。罪之者以其玩法。雖罪之。實所以生之也。題曰大誥。臣三吾竊惟皇上圖治不遑暇食。猶乃營繕是書。以爲世戒。其愛民之意深矣。臣頃在田野。欽覩犯諭戒諭榜諭。悉象以刑。不無駭焉。暮年有幸。得依日月之光。親見罪犯者相繼。乃信向所象刑。不徒象矣。是誥也。成周乃洪大誥治之誥。非直州長黨正歲時所讀之法之比也。玉音所臨。豈不曰大哉皇言乎。一哉皇心乎。自今官欽遵之爲官箴。不敢非法以撓害乎民。民欽守之爲彝訓。不敢違法以交通

乎官。將見比屋可封。堯舜之治。復見於今日矣。唐樞曰。洪武二十八年。令法司議罪。各引大誥減等。若遇恩例。則通減二等。先是十八年頒大誥。令戶有一本。若犯罪減一等。無者加一等。



大誥三編

明史各一卷

大誥武臣一卷

典彙云洪武十八年十月御製大誥成頒示天下初元  
氏以戎狄入主中國大抵多用夷法典章疏濶上下無  
等政柄執於權衡任官重於部族斷獄迷於財賄黜陟  
混於賢愚奢而僭上者無罪奸而犯倫者不問辮髮左  
衽相率而為夷至天歷時雖稱富庶而先王之制蕩然  
矣至順帝荒淫昏弱紀綱益廢內之奸臣亂政外之強  
將跋扈典兵者崇空名收民者無善政仕進者尚阿附  
而輕廉耻讀書者重浮華而乏節行庶績不凝四夷失  
序加以舞文之吏玩法於上豪強之家兼併於下事無  
統紀民無定志一遇凶荒亂者四起由法制不明而彙

倫之道壞也上嘗嘆曰華風淪沒彛道傾頽自即位以來制禮樂定法制改衣冠別章服正綱常明上下畫復先王之舊使民曉然知有禮義莫敢犯分而撓法萬幾之暇著為大誥以昭示天下且曰忠君孝親治人修己盡在是矣能者養之以福不能者敗以取禍頌之臣民永以為訓

十九年二月御製大誥續編成頒示天下上既作大誥又慮誥條所載未能盡天下之情因續為一編以申其意使民觀感知所勸懲自是民之作非者鮮從化者多故又作三編大誥其意切至而辭益加詳焉每編成上親序之被誅貪贓官吏一切作奸犯科姓名具列誥中

凡臣民家要家藏文誦以為鑒戒倘有不遵遷於化外其有大誥者偶有所犯減等科罪

二十一年八月頒賜天下武臣大誥令其子弟誦習上謂兵部曰曩因武臣有違法厲軍者朕嘗作大誥昭示訓戒格其非心開其善道今思其子孫世襲其職若不知教他日撫馭軍士或蹈覆轍必至害軍不治則法不行治之又非保全功臣意蓋導人善行如示之以大路訓人以善言如濟之以舟楫爾兵部其申諭之俾咸誦習遵守毋怠

二十四年十一月命賞民間子弟能誦大誥者 永樂初福建甌寧縣紀錄軍丁江陰年六歲能記御製大誥



詣闕陳頌賜衣及鈔驛送建寧府儒學讀書 三十年  
五月大明律誥成天下講讀大誥師生來朝者凡十九  
萬三千四百餘人並賜鈔遣還  
通紀述遺曰按宋初嚴賊吏之誅天下遂治後稍弛而  
張清鄭餘慶輩以賊敗者猶杖脊遠配故終宋世多厲  
廉節至元而漫無忌憚無怪其亂亡也我祖深懲此弊  
設犯賊無貸之令尋製大誥三編申戒不已豈非萬世  
聖子神孫所當遵行而大小臣工永為警懼者歟

大誥武臣一卷 武臣教諭一卷

明洪武中頒唐樞曰能用武者多猛悍之氣苟無以馭  
之未有不紕於事者高皇帝天下初定思欲保全羣英  
立其懲以為訓既其事而治之復諄諄諭宣敕誠使之  
檢身寡過養士愛人圖惟脩職累數千言而不憚煩其  
軍人護身敕武臣保身敕聖意藹然盡道真話何其勤  
也成祖哀集布行聿昭同德

昭示姦黨錄一卷

明祝允明九朝野記云。洪武二十三年五月初二日。以肅清逆黨。命刑部尚書楊靖。脩條亂臣情詞。播告天下。上口詔幾四千言。梅純備忘錄云。洪武三年大封功臣。十七年定功臣次第。又具于前。鄭曉異姓諸侯傳序云。洪武三年冬大封功臣。十七年定功臣次第。與前稍異。功高望重。連歲總兵者八人云。二十三年五月。肅清逆黨。命刑部尚書楊靖。條示天下。上口語幾四千言。錢謙益識。昭示姦黨後云。按庚午詔書。載于九朝野記者。首尾缺落。僅存其半。鄭曉作異姓諸侯傳。多援据此詔。第未見全文。概有舛錯。其序云。十七年定功臣次第。二十



三年肅清逆黨。此大謬也。功臣次第即定于肅清逆黨之榜。豈有兩詔乎。如曰功臣次第為十七年所定。則藍玉之進封涼國。在二十一年十二月。此詔何以不稱永昌而先稱涼國耶。舳艫航海。以二十年封。開國全寧西涼。以二十一年封。又何以備列耶。鄭氏之失考甚矣。黃金開國功臣錄云。二十三年春榜列勛臣五十七人。李善長猶居首。不知此詔在二十三年之五月。正善長等參夷之日。其榜列勛臣。所謂刑人于市與衆弃之者也。豈以此優異善長等耶。昭示奸黨第三錄載營陽侯楊璟。火者招云。洪武二十三年五月。內舍人楊達讀錄榜文。想伊父五次賣陣。我兄弟又有大罪。本年六月。欽差

官來查理旨意。觀此則肅清逆黨之詔。其榜列在二十三年五月。明矣。昭示奸黨諸錄。則又次第刊布。未必在一時也。此詔實錄失載。幾于湮沒。今幸藏弄內閣。開國勛臣之事。其強半猶可攷也。孔子二代之傷。公羊三世之論。君子不能不為之慨嘆云。

興化李清曰。予讀奸黨錄。而竊悵然于廖永忠之死也。無論平閩平粵平蜀鉅功。足贖微罪。即不然。于法亦止一死。而何云三罪。一謂永忠沉韓林兒于瓜步。上惡永忠不義。後誅之者。寧王所著通鑑博論也。一謂永忠坐僭龍鳳不法等事。處死者。劉辰所著國初事蹟也。一謂永忠黨比楊憲。人各伏誅者。是錄也。永忠將何坐焉。夫

滁陽既已早逝。林兒安得久延。脫瓜步不沉。徑抵金陵。將高皇執挺爲諸將長。稱臣階下乎。意諸臣中亦必有人焉。發縱指示。密以行權教永忠。而未可獨以爲其罪也。不立誅而後誅。吾知之矣。至黨憲云云。果何據耶。抑劉辰之言或近是耶。嗟乎。以胡廷瑞亂宮死。而後曰胡黨。以朱亮相坐鎮廣東不法杖死。而亦曰胡黨。以葉昇既坐胡黨誅。而因與藍玉姻。又以胡黨絳藍黨。它如陸聚黃彬等。則云朝廷于禮無欠。又如顧時王志等。則云不知其反之由。無欠者黨。不知者又黨耶。此數功臣者。當分明原委。使諸人各死于情實。而奈何盡以黨名之。當道有阱。行人溺焉。若以黨爲阱。以功臣爲行人。其又

何所不溺矣。黨之爲禍烈哉。夫漢唐宋之黨。皆起于末世。而明之黨。獨種于國初。吾是以爲永忠等嘆。而又不止爲永忠嘆也。雖然。永忠究何坐焉。當大封時。所司論永忠當封公。而高皇侯之。且平蜀後。高皇仍侯之。無乃以缺望誅。而所坐之三罪皆借哉。



昭示逆臣錄五卷

明  
輯錄藍黨獄詞親爲之序刊布中外今尚與昭示奸黨錄並存內閣予得叢而記之國史載藍玉反狀視庚午五月事可謂覈矣然而首尾不詳脫落太甚如五府都督從逆者十六人而畧舉黃輅等四人微此錄則後人將安取徵耶

昭陽李清曰予讀逆臣錄一序而竊爲錄外諸功臣咸慄于不寒也曰禍其胎此乎觀序中有曰有等愚昧不才者一聞陰謀欣然而從有等無義公侯雖不爲首謀危社稷任它所爲坐觀成敗又曰族滅者族滅容忍者

容忍此御製也。數語安指哉。則試問爾日諸功臣自藍黨外所餘有幾。公餘三信耳。又宋與頴耳。侯餘六。長興武定耳。鳳翔定遠耳。又永平崇山耳。信與長興武定皆以蕭曹舊勳兼許史戚。故得永堅心膂。若鳳翔耄且鮮。掀揭功題之樗櫟。以不才終幸哉。然則所謂坐視與容忍者。皆與數公無涉。而究竟誰疑。端不外宋頴二公。與定遠等三侯矣。嗟乎。謀逆何事。顧可坐觀。坐觀何罪。又可容忍。蓋雖趙臨未加。而餘波所濺。猶令人骨戰不剖。金藏之心。徒抱懷恩之足。有終歸于盡耳。夫藥布訟彭越。則苛小案誅滅。王國用訟李善長。則曰大謬不然。然漢高與高皇皆不誅。誠不諱過也。史臣之諱何爲者。于

宋頴書卒于定遠。又書卒諱也。于永平言坐法死。而不言所坐何法。于崇山言有罪伏誅。而不言所伏何罪。亦諱也。史筆自諱。天語原明。宋頴等所以死。已約畧可識。彼名山藏之誕。俞本紀事之舛。皆蛇足耳。雖然。諸功臣死矣。所畏者惡名耳。以藍黨一獄。幾網布彌天。而此數公侯者。事不掛于逆錄。名尚列于功圖。亦云恩矣。諸功臣之幸。猶高帝之厚哉。又曰。予給諫陪畿。晤錢宗伯。收齋。出其所編開國功臣事畧。見示。予受而卒業。擬錄作帳中秘。收齋曰。無庸。吾行付梓矣。不意絳雲棲一炬。竟成煨燼。惜哉。卧病經年。猶心存梗概。因舉是編。內所載奸黨逆黨二錄。姓字呼童子榻前。約畧書之。雖畧亦備。



矣。陳建皇明通紀曰：吉安侯陸仲亨、南雄侯趙庸、坐藍黨死。仲亨與庸皆胡黨。非藍黨。王世貞別集曰：永城侯薛顯、航海侯張赫、追論藍黨除。南雄侯趙庸、臨川侯胡美、東平侯韓政、坐藍黨死。赫無過于藍黨，無涉顯美。皆胡黨。非藍黨。與庸同。若政有贈，無謚。卒已久，且坐藍黨者，乃政子勛。故予特附功臣錄，為勛臣辨誤。且并辨宋公馮勝、潁公傳、友德、定遠侯王弼等之，不列藍黨。而或誤指為藍黨者。

律解辨疑三十卷

明華亭何廣公遠著。陳繼儒松江府志曰：華亭人。後遷上海，以明經為江西上饒令，尋遷御史。至陝西按察副使，精於律學。時變亂成法者，當大辟。法家因仍，凡一政令改易，輒以傳議。廣曰：嘻！若是則大辟者踵接矣。此但為改律令者言之也。學士解縉覽而是之。及卒，俞允狀其行曰：居鄉里則稱學者，任郡邑則為循吏。在風憲有澄清志，位藩垣得大臣體。時以為實錄所著有律解辨疑行於世。

問刑條例明史舒化問所著七卷

重脩問刑條例

明唐樞曰孝宗皇帝以仁厚立心而務勤政事即位十年後周知熟練雖老成臣所不能及且賢俊盈朝精明治體其典制歸一慎發虔承又思圖垂永故命三法司查議節年所行條例存其所當守而革其冗瑣書成復摘其可疑數款重勘不憚往反以酌去取定爲畫一之典本朝立國至是已百四十年時移俗易澤久化深又事無定在而政權不可以無統紀使非聖心的知會極之道其不失斯勝舉乎今案自律後所增條例餘百冊堆擁几閣弊者得緣出入而公勤之士亦不能盡檢閱之煩此書之成其真不可缺矣



明史有顧應祥重脩問刑條例七卷。在舒化問前。唐樞曰重脩問刑條例。嘉靖二十九年所成。我世宗先皇帝英敏勤政。且歷年之多。深懲事例日繁。公私見別。致有刑罰不當。雖弘治十三年。酌有條例成纂。已經五十年餘。妄引誤用。繁雜拘礙。故命刑官會集。更加詳訂。既續其後。而復采於前。再致異同。而加畱舍。故曰重脩。非專以續之也。上下劾。似深屬意。然酬物對時。亦或有該括未周。嘉靖三十四年。奉旨又取收數條。況復踰二十年餘。願幸聖天子再勤睿鑑。乃今日人心之切也。尹直瑣綴錄曰。予觀問刑條例。蓋弘治中尚書白昂等所定擬。朝廷初亦慎重。詔諭詳審。至于再三。然諸大臣

刑名欠精。不無窒礙。如殺一牛。罪至罰十。行之數月。邊將奏稱軍需缺乏。蓋牛禁過重。人莫敢殺。皮骨筋角。無處可買。朝廷悔而難改。乃喻東廠官校。莫加刺訪。又立後一條。許寡婦立其所愛之人。不思世之嫠婦。貞節者少。若許立所愛之人。則其所愛莫愛於奸夫。以例立之。誰復能禁。此誨淫長奸之大不可也。

大明律疏議

明史大明律  
十二卷

律條撮要

明史  
不載

明 張楷著唐樞曰唐律有疏議長孫無忌李勣等所撰辭義古簡後用之者可緣以出入而其隨時順情已無滯漏三代下無能及也本朝張公楷著疏議則私所自成故一遵朝制不敢參附異同乃專以今律證唐而摘刺之其謂唐合衆條而附會一例舉一律以通隸諸條而更定輕重補益弗迨芟裁繁蕪則今律大爲得體乃其至切之言中間考據沿革詳設問答足述辨旨皆各有所倚集誠可謂勤矣惟前人所未明者尚能具而正之不亦可哉



○  
讀律瑣言三十卷

明雷夢麟著唐樞曰是集於嘉靖三十年後併載後先定脩之例又詳釋而互述欲檢以應用甚便雷部郎夢麟可謂勤於明讞矣間有訓義處尚宜商之則無尼於事推也

讀律私箋

明史十四卷二

明金壇王樵方麓著嘉靖中方麓為刑部治律如治經句擲字比貫串折衷纂讀律私箋若干卷嘗歎曰士大夫以留心案牘為俗吏詩酒為風雅夫飽喫官飯受成吏胥而從事風雅可乎

律解條例

明史作律解附例八卷

隆慶五年三月刑科給事中王之垣等言律解不一理官所執互異請以大明律諸注折衷定論纂輯成書參以續定事例列附條例之後刊布中外以明法守仍乞申飭中外百司及今科進士各熟讀講求刑部覆奏從



之

大明律附例

明史載舒化問刑條例七卷刑書會據三十卷

萬歷十三年九月初二日刑部尚書舒化左侍郎取定向進新刻大明律附例題稿畧云竊惟大明律一書我聖祖參酌損益至洪武三十年而後定萬世所宜遵守一字不容差誤祇因傳寫多訛繙刻互異沿習歲久莫覺其非今委官山西清吏司郎中沈九疇等遵內府所刻律文與在外衙門刻本再三磨勘逐條開載於前各例附載於後中間查得內府律與在外刻本律文增減差誤共五十五字遵照改正刊刻成書及將弘治十年題准真犯雜犯罪名及節年題准見行納贖事例并收贖錢鈔細加查考編寫成圖一并附刻見今刊刻已完

理合先進御覽。然後頒布中外。仍乞申勅內外問刑衙門。今後問擬刑名。但要照依今次所刊律例。以昭畫一之法。奉聖旨是。

大明律例目錄云。名例律四十七條。附例九十一條。吏律二。職制十五條。公式十八條。共二十三條。附例三十一條。戶律七。戶役十五條。田宅十一條。婚姻十八條。倉庫二十四條。課程十九條。錢債三條。市廛五條。共九十五條。附例六十八條。禮律二。祭祀六條。儀制二十條。共二十六條。附例九條。兵律五。宮衛十九條。軍政二十條。關津七條。廩牧十一條。郵驛十八條。共七十五條。附例五十一條。刑律十一。賊盜二十八條。人命二十條。鬪毆

二十二條。罵詈八條。訴訟十二條。受贓十一條。詐僞十二條。犯姦十條。雜犯十一條。捕亡八條。斷獄二十九條。共一百七十一條。附例一百十二條。工律二。營造九條。河防四條。共十三條。附例八條。



大明律附例私箋集釋三十卷

明史作律例箋解

明南京都察院右都御史刑部右侍郎大理卿金壇王  
樵方麓私箋男南京禮部精膳司郎中前翰林院檢討  
王肯堂字泰集釋肯堂自序曰先少保恭簡公為比部  
郎時嘗因鞫獄引擬不當為尚書所訶發憤讀律是以  
有私箋之作兩出持憲一東莞一嘉湖皆最煩劇地而  
案無畱牘庭無冤民有餘暇焉自以為比部箋律劾也  
余久欲鐫行於世聞袁了凡先生言流傳法律之書多  
招陰譴懼而中止二十年中偃蹇場屋己丑登第進學  
詞林又以文史為職雖法曹致律例禮曹致會典而翰  
墨鞅掌不能讀也壬子予告歸子舍無意復出以輯方

書送日。前所致書。幾為蠹殘。而先公私箋手澤。亦已授從兄爾。祝久矣。比守膳部。在假多暇。且銓曹有藩憲之推。念當彈壓一方。其具不可不豫究。始發篋。取律讀之。私箋僅存坊刻。訛不可讀。而他家註釋。不得律意者多。且如大祀中祀符驗之類。皆不考國制。率爾臆解。問刑條例。其精嚴不下於律。而註釋不及焉。皆缺典也。乃集諸家之說。舍短取長。足私箋之所未備。以及見行條例。俱詳為之釋。而會典諸書。有資互考者。附焉。始庚戌十月朔。訖辛亥三月初。稿完。而余亦病矣。恭惟我太祖高皇帝。屢詔大臣更定唐律。至五六易不休。親御宸翰。為之裁定。而又特立講讀律令一條。百司官吏。務要熟讀。

講明律意。每年終。在內從都察院。在外從分巡御史。按察司官。按治考校。不能講解。不曉律意者。罰答降級。士子應舉。必試五判。以觀其明律與否。百工技藝諸色人等。有能熟讀講解。通曉律意者。得以免罪一次。郡縣里社歲時行鄉飲酒。亦惟讀律令為兢兢。蓋於金科玉條。人人提耳而教之。惟恐其不知。而誤犯以傷我好生之德者。然後知以律繩人。即古懸法象魏之意。蓋禁之於未然而非。欲不失刑於已然也。今之仕宦者。多不體此意。為經生時。既目不知律。及有民社之寄。又漫不經心。一切倚辦吏書而已。其不任吏書者。又於原籍攜帶訟師罷吏。同至任所。用為主文。招權納賄。無所不至。已多。



冤民矣。又況鍛鍊以爲能，鈎距以示察，草菅千百命，以莊嚴一官者哉。夫小民無知而犯法，猶赤子無知而入井，不能仰體聖祖之心，教詔無素，即使刑當其罪，已爲不教而誅，謂之曰虐。況移情就律，枉濫實多乎。問刑官溺職若此，皆由內外官憲官員不行考校之過也。冤抑不平之氣，上干天地之和，下爲水旱災沴。此問刑風憲官吏，安得無陰譴哉。夫律意必講而後明者，非獨詞旨簡嚴奧博，不易討究，而刑期無刑，用主不用，上帝好生之心，虞廷欽恤之意。三十卷中，時隱時見，非俗吏桎梏章句者所知，是不可以不細講也。則又安敢徇樂簡惡繁之人情，而省約其文乎。世之司民命者，倘因余言而

有感焉。體聖祖之訓，遵聖祖之訓，則祥刑爲祥刑，而臯陶邁種德之一脈，爲不斷矣。福祚且流及子孫，而又何陰謹之有。故余與虞倩來，初捐俸流通之，固了凡先生之意也。萬曆壬子三月朔旦，力疾書。

治原通訓四卷

元朶爾直班惟中撰史稱直班為木華黎七世孫官至陝西行臺御史立朝正色以扶持名教為己任薦拔人才而不以為私恩畱心經術凡伊洛諸儒之書未嘗去手喜為五言詩於字畫尤精其在經筵開陳大義為多間采前賢遺言各以類次為書凡四卷一曰學本二曰君道三曰臣職四曰國政明道厚倫制行稽古游藝五者學本之目也敬天愛民知人納諫治內五者君道之目也宰輔臺察守令將帥誓御五者臣職之目也興學訓農理財審刑議兵五者國政之目也帝覽而善之名曰治原通訓藏於宣文閣



端本堂經訓要義十一卷  
元至正九年上命翰林學士兼諭德李好文取史傳及  
先儒論說有關治體而協經旨者加以所見倣真德秀  
大學衍義之例為書十一卷名曰端本堂經訓要義奉  
表以進詔付端本堂令太子習焉

奎章政要

元揭傒斯曼碩撰文宗日御奎章閣柯九思為博士虞集為學士每以詩文應制獨揭傒斯進奎章政要一書為文宗所善



--	--	--	--	--	--	--	--	--	--

